



Nunanut Allanut tunngasutigut naalackersuinikkut ingerlatsineq pillugu nassuiaat 2020.

(Nunanut Allanut Nukissiuuteqarnermullu Naalackersuisoq)

Siullermik Naalackersuisut qutsavigissavakka Nunanut Allanut tunngasutigut naalackersuinikkut ingerlatsineq pillugu nassuiaateqarnerannut, Demokraatiniit sukumiisumik atuarsimasatsinnut.

Tulliullugulu nuannaarnera tulluusimaarneralu takutillara, Nunanut Allanut Naalackersuisup Pituffik pillugu USA-mut nutaamik isumaqatigiisummik angusaqarsimaneranut. Isumaqatigiissut, Kalaallit Nunaata 2024-miit amerikkarmiut Pituffimmiinnerannut annerpaamik pissarsiffiginissaanut qulakkeerinnittoq. Isumaqatigiissutip kingunerissavaa, amerlanerusunik ilinniarfissanik peqalissasoq, suliffissanik amerlanerusunik periarfissaqalissasoq nunattalu karsianut akileraarutigut amerlanernik isaatitsiffiussasoq. Tamanna pisinnaalerpoq pingaarnertut pissutaalluni sullissinissamik isumaqatigiissut 2024-miit ingerlatsivimmit Kalaallit Nunaanni inissisimasumut, Kalaallit Nunaannilu nunaqartumik aqunneqartumut isumaqatigiissutaasimammat.

Pingaaruteqartorujussuuvoq, nunanik allanik pissaanilissuarnik suleqateqarnissap pingaartinnissaa, suleqatigiiffittut pitsaasutut iluaqutaasussamillu suleqatigiiffiisunnaasoq. Pituffik pillugu USA-mut isumaqatigiissuteqaqqammernerup tamanna takutippaa. Isumaqatigiissutillu taassuma kusanartup isumassarsivissatut atorneqarnissaa, sulerulunnikkut nunanut allanut pitsaasunik isumaqatigiissuteqarnissaq periarfissaqartoq. Isumaqatigiissutit, Kalaallit Nunaannut iluaqutaasussat.

Neriuppugut, EU-mut isumaqatiginninniarneq aamma taamatut ingerlassasoq, pingaartuummat isumaqatigiissuteqarnissaq, minnerpaaffiatigut ullumikkut isumaqatigiissutigeriikkatsinnut nallersuunneqarsinnaasoq. Neriuppugullu, Tului Nunaannut tamanna aamma atuukkumaartoq, Brexit pissutigalugu pingaartuummat niueqatigiinnissamut isumaqatigiissutip naammassinissaa, aalisakkanik nioqqtissiatta akitsuuserneqannginngissaat qulakkeerniarlugu, akitsuuserneqarunik tuniniarnissaat ajornarlunngajassammat. Allatut oqaatigalugu, nunanut allanut tunngasunik suliasarpassuaqarpugut.

Nunatut imminut pilersunngilluinnartut, nunanut allanut niuerneq pingaaruteqartorujussuuvoq. Tamanna pingaaruteqarpoq paasissallugu, taamaattumillu aamma pingaaruteqarluni, niueqatitsinnut pitsaasumik atassuteqarnissarput. Kisiannili aamma pingaartuuvoq, uagut nammineq naleqarnitta ilisimaarilluarnissaa. Aalisagaatigut qaleruallillu piumaneqaqaat, tamannalu nuannaarutigisariaqarparput. Siunissaq eqqarsaatigalugu neriutigaarput, aatsitassaatigut aamma taama piumaneqartigilissasut, taakku aamma aqqutigalugit nunatta ineeriartortuarnissaanut peqataasinnaammata.

Demokraatit tassunga atatillugu iluarisimaarpaat, Asiap Kangisissuani pisortatigoortumik aallartitaqalernissamut suliaq ingerlallualereemat. Asiap Kangia niuerfiuvoq pingaaruteqartoq, taamaattumillu aamma pingaartuuvoq, pisortatigoortumik najuunissatta naqissusernissaa.



Uanga isumaga malillugu, Nunanut Allanut naalakkersuinikkut anguniagassaasoq unaasoraara silaannaap allanngoriartorneranut Kalaallit Nunaata maluginiarneqarnerunissaa. Taaannami sammisaq nunat killiginik apeqqusersuinngitsuummat. Taamaattumik taannaavoq, nunanit ataasiakkaanik annertoorujussuarmik sunniisinnaasoq. Isertuunneqarsinnaangilaq, uagut nunatut eqqorneqarsinnaasut ilagimmatigut.

Issittumi siku, aakkiartortoq inuit piliaanik silaannaap allanngoriartorneranik malitseqartoq, inuuniarnerput issittumi, taassuminnga sunnerneqarpoq.

Tamanna tunngavigalugu Demokraatit isumaqarput, pingaartuusoq, ullumikkumiit oqaaseqarnerusariaqartugut, nunarsuatsinnut takutissagutsigu, silaannaap allanngoriartornerata suut kingunerinerai. Nunarsuatsinni ataasinguamilluunniit nunaqanngilaq, kisimiilluni silaannaap allanngoriartorneranut akiusinnaasumik. Ataqaatigiinneq, suleqatigiinneq aammalu nunat assigiinngitsut akornanni pituttuisumik isumaqatigiissusiornerit piumasaqaataapput. Tassanilu uagut Kalaallit Nunaanniit annertuumik akuusinnaavugut, tamannalu ilungersorluta suliniutigisariaqarparput.

Naggataatigut apeqqutigilaarniarpara 2015-imi Illersornissamut nukittorsaalluni iliuuseqarnermut isumaqatigiissummut tunngasoq. Kalaallit Nunaannut pilersaarutit suut piviusunngortinneqarsimappat, suullu sulii utaqqinsinneqarpat?